

## → MUKA DUA

# Malaysia sedia bantu India siasat kes Zakir Naik

➔ Bantuan perundangan diberi jika ada permintaan New Delhi: TPM

Oleh Irwan Shafrizan Ismail  
irwansha@bh.com.my

Putrajaya

Malaysia sedia bekerjasama sekiranya Kerajaan India meminta bantuan negara ini dalam siasatan terhadap pendakwah antarabangsa, Dr Zakir Naik, berkaitan dakwaan hasutan keganasan, kata Datuk Seri Dr Ahmad Zahid Hamidi.

Timbalan Perdana Menteri berkata, siasatan tidak boleh dibuat oleh Malaysia, tetapi oleh negara yang membuat dakwaan dan mahu siasatan dilakukan terhadap pendakwah terbabit.

"Ini bukan soal menyerahkan dia (Zakir), tetapi soal siasatan (berhubung dakwaan keganasan). Kita ikut sistem perundangan negara ini dan rangka hubungan diplomatik yang ada dengan mana-mana negara, jika ada permintaan

(bantu siasatan), kita akan beri kerjasama penuh.

"Siasatan tidak boleh dibuat pihak Malaysia, tetapi bantuan perundangan bersama (MLA) boleh diperolehi jika negara itu mempunyai hubungan dan perjanjian dengan Malaysia," katanya kepada pemberita selepas merasmikan Persidangan Ekologi Manusia Antarabangsa anjuran Universiti Putra Malaysia (UPM), di sini semalam.

## Notis INTERPOL

Baru-baru ini, Agensi Siasatan Kebangsaan India (NIA) memutuskan untuk mendapatkan notis INTERPOL terhadap Dr Zakir bagi menghalang pergerakannya keluar dari Arab Saudi selepas ingkar saman berulang kali terhadapnya supaya satu siasatan dibuat.

Dr Zakir didakwa menghasut generasi muda Islam untuk terbabit dalam keganasan selain menganjurkan permusuhan antara



Ahmad Zahid bersama Naib Canselor UPM, Prof Datin Paduka Dr Aini Ideris (kiri) dan Dekan Fakulti Ekologi Manusia, Universiti Putra Malaysia, Profesor Dr Laily Paim melancarkan Persidangan Antarabangsa Ekologi Manusia di Putrajaya, semalam.



Saya ingin mengesahkan bahawa Dr Zakir penduduk tetap tetapi bukan warga Malaysia, status terbabit diberikan lebih lima tahun lalu, sebelum saya menjadi Menteri Dalam Negeri"

Ahmad Zahid Hamidi,  
Timbalan Perdana Menteri

masyarakat berasaskan agama dan kaum.

Malah, Dr Zakir pada sidang media selepas satu persidangan di Malaysia Ahad lalu, dilaporkan meminta pihak berkuasa India untuk datang mencarinya di Malaysia dan beliau juga tekad tidak akan menyerah diri kepada NIA kerana mendakwa bimbang akan diseksa seandainya ditahan.

Ahmad Zahid menegaskan, Malaysia tidak boleh melakukan tindakan ekstradisi Dr Zakir kepada negara yang menjalankan siasatan kerana pendakwah itu tidak tinggal di Malaysia, sebaliknya hanya memiliki status penduduk tetap (PR).

"Saya ingin mengesahkan bahawa dia penduduk tetap tetapi bukan warga Malaysia, status terbabit diberikan lebih lima tahun lalu, sebelum saya menjadi Menteri Dalam Negeri. Dia hanya ada PR, dia juga tinggal di beberapa negara lain dan terpolung kepada kera-

jaan India untuk memohon kerjasama dengan mana-mana negara," katanya.

Mengulas perkembangan status Kedutaan Malaysia di Korea Utara, beliau berkata perkara itu akan dibincangkan bersama Perdana Menteri, Datuk Seri Najib Razak dan Menteri Luar, Datuk Seri Anifah Aman.

## Bahaya salah guna media sosial

Dalam perkembangan lain, Ahmad Zahid berkata media sosial boleh menjadi satu bentuk revolusi budaya berbahaya yang mampu merosakkan ekosistem seandainya tidak digunakan secara bijak dan positif.

"Perantaraan yang ditawarkan media sosial menjadi pentas untuk menyebarkan fahaman tidak bermoral, ruang untuk mempromosi kegiatan keganasan, propaganda, kebencian dan penyebaran pembongkaran," katanya.